

JUANĒAN A PAIN BUANMIA QUIRICA

Anun Jesucristonan 'iti bana

1 ¹Ēnē mecama unioisama 'aímbia aín Papabē 'iá axa ěnē menu uá, a ñuiquin cananuna ěnē quirica mitsu cuēñeoxunin. A cananuna aín bana cuanan nun bĕrúnbi isacĕn. Nun bĕrúnbi ñachaquin isanan cananuna nun mĕcĕnanribi ramĕacĕn. Ax bamati-moi tsóćĕ 'ixuan aín unicamaribi abĕ 'inun 'imicĕ, a ñuiquin cananuna mitsu cain. ²A cananuna nusaribi 'aish uni 'icĕ nun 'unánĕn. Usa 'ixun cananuna asĕrabi a isacĕn. Isá 'ixun cananuna a mitsu ñuixunin. Ax aín Papabē 'itancĕxbi ěnē menu uá 'ixun ca bamati-moi tsóćĕ 'ixun, usaribitinu abĕ 'inun nu 'imiti 'icĕ quixun cananuna mitsu ñuixunin. ³Nuxnu asĕrabi Nucĕn Papa Dios 'imainun aín Bĕchicĕ Jesucristobĕ upí 'icĕsaribitimi mitsúxribi nubĕ Jesucristomi upiti sinánun quixun cananuna nun nu isanan cuacĕ, ěnē ñucama mitsu ñuixunin. ⁴Upí oquin sinanimi chuámaishirua tani cuĕñun cananuna ěnē banacama ěsoquin mitsu cuēñeoxunin.

Nucĕn Papa Diosan unían ñu 'atima 'ati sinántima bana

⁵Jesucristonĕnbia nu pain 'unánmia 'ixun cananuna ěnē bana mitsu ñuixunin: Nucĕn Papa Dios an ca asĕrabi upíira 'ixun ñu upíshi 'aia. An ca unĕxun ñu 'aíma. Usa 'ain ca uisa

'uchabi anu 'aíma 'icĕn. ⁶Ñu 'aisama 'aíbi —ainan 'aish cana Nucĕn Papa Diosbĕ upí 'ai —qui cananuna cĕmĕin. Ainan cana 'ai quicĕ 'ixunbi ax quicĕsabi oquin 'aquinma ñu 'atima 'ai cananuna cĕmĕin. ⁷Usa 'aímbi cananuna axa 'icĕsaribiti ñu 'atima 'ati sinánĕma 'ianan Nucĕn Papa Diosbĕ upí 'aish, axa ami catamĕcĕ unicamabĕribi upiti nuibananin. Usafnu 'ia ca an, aín Bĕchicĕ Jesucristo aín imi 'apati bama cupí, uisa ñu 'ai caranuna 'uchai, abi nu tĕrĕnxunia.

⁸—'Ēx cana 'uchañuma 'ai —qui cananuna nuxbi cĕmĕin. Usa 'ain ca nun bana asĕrabima 'icĕn. ⁹Usa 'aímbi cananuna 'unánti 'ain, nun nu nun 'uchacama chiquinaxuncĕxun ca Nucĕn Papa Diosan, ax upí 'ixun ax quicĕsabi oquin 'aquin, nun 'uchacama nu tĕrĕnxunquin upí 'inun nu 'imiti 'icĕn. ¹⁰Nucĕn Papa Diosan bana ca quia —camabi unin ca ñu 'atima 'aia —qui ax. Usaía quicĕ 'aímbi —'ĕn cana ñu 'atima 'acĕma 'ai —qui cananuna —Nucĕn Papa Diosan bana ca cĕmĕ 'icĕ —quicĕsa 'ain. Usai quicĕ 'ixun cananuna, asĕrabi ca aín bana 'icĕ quixun sinaniman.

Cristo, an Nucĕn Papa Dios nu ñucáxuncĕ

2 ¹Ēn bĕchicĕsa 'icĕ, cana ñu 'atimami 'atin rabanen ěnē ñucama mitsu cuēñeoxunin. Usa 'aímbia uinu 'icĕ unix cara 'uchaía, a an ñucáxunti ca

Nucën Papa Diosbëa 'icë Jesucristo, ax 'icën. Ax ca uisa 'uchañumabi asérabi upíira 'icën. ²Jesucristo axa bama cupí ca nun 'uchacama téréncë 'icën. Nunanshima camabi unin 'uchacamari-bia téréncë 'inun ca Jesucristo bamacëxa.

³Aín bana quicësabi oquin 'acë 'ixun cananuna 'unanin, nux cananuna asérabi ainan 'aish a 'unáncë 'ai quixun. ⁴Usa 'aínbi ca uix cara —'ën cana ainan 'ixun Nucën Papa Dios 'unani —quibi aín bana quicësabi oi 'ima, a uni cëmë 'icën. Usa 'aish ca cëmëishi banaia. ⁵Usa 'aínbi ca an aín bana quicësabi oquin 'acë uni ax éníma upíti Nucën Papa Diosmi sinania. Usa 'ixun cananuna 'unanin, nux cananuna asérabi ainan 'ai quixun. ⁶Usa 'ain ca axa —ainan 'aish abë 'icë ca Nucën Papa Diosan 'ë sinánmia —quicë uni, ax Jesucristo 'iásaribiti 'iti 'icën.

Axa quicësaribiti 'iti bana

⁷'Ën xucéantu, mitsun 'unáncëma bana ñuiquin cuëñoquin cana mitsu caiman. Jesucristomi catamëtabaquinmi cua bana abi cana mitsu ñuixuntécënin. ⁸'Ën mitsu ñuixuncë bana íoma 'aínbi camina a banabi mitsun 'ásamaira oquin 'unáncë 'aish ax quicësabi oi 'in, Cristo 'iásaribiti. Usari 'i camina mitsun ñu 'atima 'acëcama éni Nucën Papa Diosbë upí 'aish ax cuëncësabi oi 'in.

⁹Uix cara —'ëx cana ainan 'aish Nucën Papa Diosbë upí 'ai —quibi nuibatíma uni itsimi nishia, ax ca Nucën Papa Diosnanma pain 'icën. ¹⁰An uni itsi nuibacë uni ax ca Nucën Papa Diosnan 'aish abë upí 'icën. Usa 'ain ca a cupía a uni 'uchati ñu 'aíma 'icën. ¹¹Usa 'aínbi ca nuibatíma bëtsi unimi nishcë uni an Nucën Papa Diosbë upíma 'ixun ñu 'atima 'atishi sináncë cupí sinánñumasa 'ixun uisai cara 'iti 'icë quixun 'unanima.

¹²'Ën bëhichësa 'icë, cana Jesucristo cupía Nucën Papa Diosan mitsun 'uchacama téréncë cupí mitsu quirica cuëñëoxunin. ¹³Uni apáncama, mitsúnmi axa ënë mecama unioisama pain 'aishbi 'iá, Nucën Papa Dios, a ainan 'ixun 'unáncë cupí cana mitsu quirica cuëñëoxunin. Bëná unicama, mitsuribishi cana ñunshin 'atimanën 'apúan ñu 'atima 'amitisa tancëxun-bimi 'acëma cupí quirica cuëñëoxunin.

'Ën bëhichësa 'aishmi ainan 'ixun Nucën Papa Dios 'unáncë cupí cana mitsuribi quirica cuëñëoxuan. ¹⁴Uni apáncama, mitsúnmi axa ënë mecama unioisama pain 'aishbi 'iá, Nucën Papa Dios, ainan 'ixun 'unáncë cupí cana mitsu quirica cuëñëoxuan. Bëná unicama, mitsux Jesucristomi cushicë 'ianan Nucën Papa Diosan bana mitsun nuitunënbí sináncë 'ixun ñunshin 'atimanën 'apúan ñu 'atima 'amitisa tancëxunbi 'acëma cupí cana mitsu quirica cuëñëoxuan.

¹⁵'Ënë nëtënxuan Nucën Papa Dios cuëñcëma ñu an 'unáncëma unin 'acësa oquin 'ati camina cuëñtíma 'ain. Uix cara ax cuëñcëma ñu 'ai cuëñia, ax ca Nucën Papa Diosmi sinanima. ¹⁶An ënë menu 'icë ñuishi sináncë unix ca ñunshínquin piti, xëati, xanubë 'iti acama sinánan ñu 'atima isti cuëëanan —ñuñu cana 'ai —quixun sinani rabitia. Nucën Papa Diosan ca usaía 'inun uni sinánmi-cëma 'icën. Abi ënë menu 'icë ñuishi sináncë 'aish ca uni usai 'ia.

¹⁷Mecama 'imainun anu 'icë ñucamax-ribe ca cëñúti 'icën. 'Imainun ca ñunshínquian unin a 'atishi sináncë ñu 'atimacamaxribe cënúti 'icën. Usa 'aínbi ca axa Nucën Papa Dios cuëñcësabi oi 'icë unicama xëñibua 'aínbi abë 'iti 'icën.

An —Jesús ax ca asérabi Cristo 'icë cacë unicama 'imainun axa —cëmë ca a bana 'icë —quicë unicama ñuicë bana

¹⁸Ën bëchicësa 'icë, cana mitsu cain, anúan ënë mecama cëñúti nëtë ca 'urama 'icën. A nëtëa ucëma pan 'ain ca axa Cristo 'atimaquin ñui banacë uni uti 'icë quixun camina cuan. Ca uti 'icë 'aínbi ca bërfibi 'itsa unin Cristo 'atimaquin ñuia. Usa 'ain cananuna 'unanin, anúan ënë mecama cëñúti nëtë ca 'urama 'icë quixun. ¹⁹An Cristo 'atimaquin ñuicë unicama nubë 'ixunbi ca nu ëanxa, asérabi nun 'acësaribi oquin Jesucristo sináncëma 'ixun. Nux 'icësaribiti asérabi Jesucristomi sináncë 'aish ca nubë bërucë 'itsianxa. Usa 'ain ca atúan nu ëncë cupí camaxunbi 'unánti 'icën, nubëa ax timëcë unicamax ca camáxira asérabi nux 'icësaribiti Jesucristomi sináncëma 'iaxa quixun.

²⁰Usa 'aínbia Cristo cupí Nucën Papa Diosan Bëru Ñunshin Upí mitsubë 'ain camina 'unanin, atúan Jesucristo 'atimaquin ñuicë banacamax ca cëmë 'icë quixun. ²¹Mitsúnmi Cristonan 'ixun ax cuëncësabi oi 'iti 'unáncëma cupí cana mitsu caiman. Mitsúnmi a ñucama 'unáncë cupí cana mitsu ënë quirica cuënëoxunin. Camina 'unanin, Cristonan 'ixun ax cuëncësabi oi 'iti 'unáncë uni ax ca cëmëtima 'icën.

²²¿Uix cara cëmë uni 'ic? Axa —Jesús ax ca Cristoma 'icë —quicë uni ax ca a 'icën. A unix ca axa Cristomi 'atimati banacë a 'icën. Ax ca aín Bëchicë 'imainun Nucën Papa Diosmiribi 'atimati banaia. ²³Camabi uni axa —Jesús ax Cristoma 'icë, cana ami catamëtima 'ai —quicë uni, ax ca Nucën Papa Diosmiribi catamëcëma 'icën. Usa 'aínbi ca axa —Jesús asérabi Nucën Papa Diosan Bëchicë 'aish asaribi 'icë cana ami catamëti —quicë unicama, abë

Jesucristo 'imainun Nucën Papa Diosribi 'icën.

²⁴Usa 'ain camina Jesucristomi catamëtabaquinmi cua a bana manuquinma upí oquin sinánti 'ain. A bana asérabi sináncë 'aish camina abë upí 'aish ënima camabi nëtën aín Bëchicë 'ianan Nucën Papa Diosbëribi 'iti 'ain. ²⁵Jesucristonëxbi ca quiacëxa, a cupíshi cananuna ainan 'aish Nucën Papa Diosbë xëñbua 'aínbi 'iti 'ai quiax.

²⁶An mitsu parántisa tancë unicama ñuiquin cana ënë banacamax mitsu cuënëoxuan. ²⁷Atúxa usa 'aínbi ca Jesucristonën aín Bëru Ñunshin Upí mitsubëa 'inun 'ináncë, ax mitsubë 'ixun uni itsían 'unánmiamabi an mitsu 'unánmia. An mitsu 'unánmicë ñux ca asérabi 'aish cëmëma 'icën. Usa 'ain camina aín Bëru Ñunshin Upitan 'unánmiquin sinánmicësabi oi camabi nëtën Cristobë 'iti 'ain.

²⁸Ën bëchicësa 'icë, cana mitsu cain, utëcënquian Jesucristonën nu upí isti cupí camina camabi nëtën an sinánmicë sabi oquin sinánti 'ain, axa ucëbë rabíntima cupí. ²⁹Mitsun camina, Jesucristo ax ca asérabi upí 'icë quixun 'unanin. Usa 'ixun camina ësaquinribi 'unánti 'ain, an upí ñu 'acë unicamax ca Nucën Papa Diosan bëchicë 'icë quixun.

Nucën Papa Diosan bëchicëcama ñuicë bana

3 ¹Nux cananuna Nucën Papa Diosan bëchicë 'ain, an cacësabi oi. An aín bëchicë ca quixun nu cacë cupí cananuna 'unánti 'ain, uisaira oquin cara an nu nuibatia quixun. Usa 'aínbi ca an ënë menu 'icë ñuishi sináncë unicaman ainanma 'ixun Nucën Papa Dios 'unáncëma cupí, nux cananuna aín bëchicë 'ai quixun 'unanima. ²Ën nuibacë xucéantu, bërfi cananuna Nucën Papa Diosan bëchicë 'ain. Usa 'icëbi ca

uisaira caranuna 'inuxun 'ai quixun an nu 'unánmicëma pan 'icën. Usa 'aínbi cananuna 'unanin, Jesucristo utécëncë bëtan cananuna upí oquin uisa cara ax 'icë quixun isti 'ain. A isi cananuna asaribi 'iti 'ain. ³Uicaman cara —asaribi cana 'iti 'ai —quixun sinania, a unicamax ca Jesucristosaribi 'iti cupí, aín 'uchacama ëni upí 'ia.

⁴Usa 'aínbi ca an ñu 'atima 'acë unicama, ax Nucën Papa Diosan bana quicësabi oi 'ima 'uchaia. Nucën Papa Diosan bana quicësabi oquinu 'acëma, ax ca 'ucha 'icën. ⁵Camina 'unanin, unin 'uchacama térénux ca Jesucristo uacëxa, ax uisa 'uchañumabi 'ixun. ⁶Usa 'ain ca uix cara ainan 'aísha, a ëníma abë 'icëa Nucën Papa Diosan sinánmicë 'icë, a unin ñu 'atima amiribi amiribi 'aima. An ñu 'atima amiribi amiribi 'acë uni ax ca ami catamëcëma 'ianan uisa cara ax 'icë quixun Jesucristo 'unáncëma 'icën. ⁷Ën bëchicësa 'icë, cana mitsu cain, unin paráncë camina 'itima 'ain. An upí ñu 'acë uni ax ca Jesucristosaribi 'aish aín nuitu upí 'icën. ⁸Usa 'aínbi ca an ñu 'atima 'acë unicama ax ñunshin 'atimanën 'apun uni 'icën, ñunshin 'atimanën 'apu ax ca nëtë ióñubi 'ucha 'aish usabii bërí nëténbi 'uchaia, usa 'ain. Usa 'aínbi ca ñunshin 'atimanën 'apúan ñu 'atima 'acëcama cëñui Nucën Papa Diosan Bëchicë uacëxa.

⁹Uix cara aséribi Nucën Papa Diosan bëchicë 'icë, an ca ñu 'atima 'ati sinanima. An 'acésaribi oquin sinánun Nucën Papa Diosan 'imicë 'ixun ca aín bëchicëcaman ñu 'atima 'ati sinanima. Usa 'ixun ca 'uchatëcënti sinanima.

¹⁰Ënëx ca ësa 'icën. Ui unin cara ñu upí 'aima ax ca Nucën Papa Diosnanma 'icën, ui unin cara uni itsiribi nuibatima axribi ca Nucën Papa Diosnanma 'icën. Usa 'ain cananuna uinu 'icë unix cara Nucën Papa Diosan bëchicë 'icë quixun

'unánan uinu 'icë unix cara ñunshin 'atimanën 'apunan 'icë quixun 'unánti 'ain.

Unicamaxa bëtsibë bëtsibë nuibananti bana

¹¹Jesucristomi catamëtabaquinbimi mitsun cua a bana ca ënëx 'icën, bëtsibë bëtsibë cananuna nuibananti 'ai quicë.

¹²Ñunshin 'atimanën 'apunan 'ixun ca Cainan aín xucénbi 'acëxa. Usaribi cananuna 'itima 'ain. ¿Uisa cupí cara Cainan aín xucën 'acëx? Aín xucënan 'acë ñu upí 'imainuan an 'acë ñu upíma 'ain ca Cainan aín xucën 'acëxa.

¹³Ën xucéantu, axa Jesucristomi catamëquinma ënë menu 'icë ñuishi sináncë unicaman mitsumi nishquin nuibacëxunmabi camina —uisacatsi cara 'ëmi nishia —quixun masá nuituquin sinántima 'ain. ¹⁴Nux 'icësaribitia ax Jesucristomi catamëcë unicama nuibacë 'ixun cananuna 'unanin, nux ainanma 'ía 'aíshbi cananuna bërí Nucën Papa Diosnan 'ai quixun. An uni itsiribi nuibacëma uni ax ca Nucën Papa Diosnanma 'aish usabi 'icën. ¹⁵An ami nishquin uni raíri nuibacëma uni ax ca an uni 'acë unisa 'aish 'aisama 'icën. Camina 'unanin, an uni 'acë unix ca Nucën Papa Diosnanma 'aish xëñibua 'aínbi abë 'itima 'icë quixun.

¹⁶Jesucristo nu nuibati bama cupí cananuna 'unanin, usari ca uni nuibati 'iti 'icë quixun. Usaquin 'unánquin cananuna 'unanin, Jesucristonën 'ásaribi oquin cananuna nunribi a 'aquincë cupí bamanuxunbi 'aquinquin bëtsi uni nuibati 'ai quixun. ¹⁷¿Usa 'ain cara an ñuñu 'ixunbi axa 'aquinsa 'icë isquinbi uni itsi nuibaquin 'aquincëma uni, ax Nucën Papa Diosmi sináncë 'ic? Usama ca. ¹⁸Ën bëchicësa 'icë, cana mitsu cain, nun cuëbitanshi uni —'ën cana mi nuibati —quixun caquinma cananuna

asérabi nuibaquin 'aquinsa 'icé a 'aquinti 'ain.

**Cananuna asérabi Nucën Papa Diosnan
'ai quixun 'unánti bana**

¹⁹Nun uni nuibaquin 'aquincé 'ixun cananuna 'unánti 'ain, nun cananuna asérabi ainan 'ixun Nucën Papa Dios cuëencésabi oquin 'ai quixun. Usaquin 'unani cananuna bënëtima chuámarua 'iti 'ain. ²⁰Usa 'ain ca nun —'ëx cana upíma 'ai —quixun sinaniabi Nucën Papa Diosan, an camabi ñu 'unáncé 'ixun, nun sínánribi 'unania. ²¹'Ën nuibacé xucéantu, nun ñu 'atima 'acécama a mënócé 'ain cananuna a sinani masá nuitutima Nucën Papa Diosbë banati 'ain. ²²Nun ax quiásabi oquin 'anan, ax cuëencésabi oquin 'aia isquin ca an nun ñucácséabi oquin nu 'axunia. ²³Axa quicésabi oquin 'ati bana ax ca ésa 'icën, cananuna aín Bëchicé Jesucristomi cataméanan bëtsibë bëtsibë nuibananti 'ain, an nu cacésabi oi. ²⁴Axa aín bana quicésabi oi 'icé unicamax ca Nucën Papa Diosbë 'icën, 'imainun ca axribi atubë 'icën. An nu 'ináncé aín Bëru Ñunshin Upí ax nubë 'ain cananuna asérabi 'unanin, Nucën Papa Dios ca nubë 'icé quixun.

**Axa ami sináncéma uni 'imainun axa
Nucën Papa Diosmi sináncé uni
ñui quicé bana**

4 ¹'Ën nuibacé xucéantu, ëné nētēnu-xun ca 'itsa unin —Nucën Papa Diosan sínánmicëxun cana uni bana ñuixuni —quiquinbi an sínánmicëxun-mabi anbia sináncé bana uni ñuixunia. Usa 'ain camina —Nucën Papa Diosan ca 'ë sínánmia —quiquian unin ñuicé bana acamaira cuatima 'ain. Upí oquin pain camina asérabi cara Nucën Papa Diosan sínánmicëxun uni ñuixunia quixun cuati 'ain. ²'Ësquian camina

'unánti 'ain, ui unix cara Nucën Papa Diosan Bëru Ñunshínñu 'icé quixun: An —Jesucristo ca uni 'inux uacéxa —quixun asérabi 'unáncé uni, an ca Nucën Papa Diosan Bëru Ñunshin Upitan anu 'ixun 'unánmicëxun usaquin 'unania. ³Usa 'aínbi ca an usaquin Jesús 'unáncéma uni, ax Nucën Papa Diosan Bëru Ñunshin Upíñuma 'icën. Usa 'aish ca an Cristo 'atimaquin ñuicé uni banacésa 'icën. An Cristo 'atimaquin ñuicé uni ca uti 'icé quixun camina cuan. Usa uni ca uti 'icé quiáxa quicé 'aínbi ca bëtsi bëtsi unin bëríbi Cristo 'atimaquin ñuia.

⁴'Ën bëchicésa unicama, mitsux camina Nucën Papa Diosnan 'ain. Nucën Papa Dios axa mitsubë 'icé aín cushibë tan sënëmma ca an ëné nētēnu 'icé ñuishi sináncé unicaman cushi 'icën. Usa 'ain ca an Cristo 'atimaquin ñuicé unicaman sinanëx mitsun sínánbëtan sënëmma 'icën. ⁵A unicamax ca ëné menu 'icé ñuishi sináncé 'aish a ñuishi ñui banaia. Usa 'icé ca asaribi unicaman aín bana cuatia. ⁶Usa 'aínbi cananuna nux Nucën Papa Diosnan 'ain. Ainan cupí ca uicaman cara ainan 'ixun a 'unánxa an cuni nun bana cuatia. Usa 'aínbi ca Nucën Papa Diosnanma unin nun bana cuatima. Usa 'ain cananuna 'unánti 'ain, uin cara nun bana cuatia ax ca Nucën Papa Diosan sínánmicé 'icé quixun. Usaribi oquin cananuna 'unánti 'ain, uin cara nun bana cuatima, ax ca Nucën Papa Diosan sínánmicéma, ñunshin 'atimanën sínánmicé 'icé quixun.

**Nucën Papa Dios an ca
nu nuibairia quicé bana**

⁷'Ën nuibacé xucéantu, cana mitsu cain, Nucën Papa Diosan sínánmicëxun ca unin uni itsi nuibatia. Usa 'ain cananuna ainan 'aish bëtsibë bëtsibë

nuibananti 'ain. An uni itsi nuibacé unicamax ca Nucèn Papa Diosan bëchicé 'ianan a 'unáncé 'ixun an sináncësa oquin sinania. ⁸Nucèn Papa Dios ax ca an unicama nuibairacé a 'icén. Usa 'ain ca an bëtsi uni nuibacëma uni ax Nucèn Papa Dios 'unáncëma 'icén. ⁹Nucèn Papa Diosan ca aratsuishi 'icëbi aín Bëchicé ëné menu uni 'inun xuacëxa, a cupínu nux ainan 'aish nëtétimoi abë 'inun. Usoquian 'á 'ain cananuna 'unanin, uisaira oquin cara Nucèn Papa Diosan camabi uni nuibatia quixun. ¹⁰Ami sináncëxunmabi unicama nuibaquin ca Nucèn Papa Diosan, a cupí unin 'uchacama tërécé 'inuan ëné menuax bamanun aín Bëchicé xuacëxa. Usoquin xuá 'ain cananuna 'unanin, usaira oquin ca Nucèn Papa Diosan unicama nuibatia quixun.

¹¹Ën nuibacé xucéantu, Nucèn Papa Diosan unicama usaira oquin nuibacé 'ain cananuna nuxribi usaribiti bëtsi unicamabë nuibananti 'ain. ¹²Nucèn Papa Dios ca uinu 'icé unímbi isáma 'icén. Usa 'aínbinu nux bëtsibë bëtsibë nuibanancëbë ca ax nubë 'icén. Nubë 'ixun ca an 'acësaribi oquinu unicama nuibanun nu 'imia. ¹³An aín Bëru Ñunshin Upí nubëa 'inun 'ináncé 'ixun cananuna 'unanin, nux cananuna abë 'ai quixun. 'Unánan cananuna —ax ca nubë 'icé —quixun 'unanin. ¹⁴Nunbi cananuna, an atun 'ucha tërénquin ëné menu 'icé unicama ainan 'inun iéminuan Nucèn Papa Diosan xuá, aín Bëchicé a isacén. Isá 'ixun cananuna a ñuiquin mitsu cain. ¹⁵Uin cara —Jesucristo ax ca aséribi Nucèn Papa Diosan Bëchicé 'aish asaribi 'icé —quixun 'unánquin unicama ñuixunia, ax ca Nucèn Papa Diosbë 'icén. 'Imainun ca Nucèn Papa Diosribi a unibë 'icén.

¹⁶Usa 'ain cananuna aséribi 'unanin, Nucèn Papa Diosan ca nu nuibatia

quixun. Nucèn Papa Dios ax ca an unicama nuibairacé a 'icén. Usa 'ain ca an aín sinan upí 'ixun uni nuibacé uni ax Nucèn Papa Diosbë 'icén. 'Imainun ca Nucèn Papa Diosribi a unibë 'icén. ¹⁷Usa 'ixun cananuna an nu nuibaquin sinánmicé 'ixun ax cuëncësa oquin Nucèn Papa Diosmi upiti sinánan unicama nuibatin. Usa 'aish cananuna nux ëné nëtënuax asaribi 'aish, anuan Jesucristo utécënti nëtën nux masá nuituti rabíntima 'ain. ¹⁸Usa 'ain ca an Nucèn Papa Diosmi sinánan bëtsi uniribi nuibacé uni, ax ami 'uchacëma 'aish unimi racuëtima. Anuan Jesucristo utécënti nëtënrribi ca racuëtima 'icén. Usa 'aínbi ca unix aséribi bëtsi unibë nuibanancëma 'aish racuëti 'atimaquin sinani bënëtia. Usa unin ca upiti nuibananti 'unanima.

¹⁹An paían nu nuiba 'ain cananuna nuxribi Nucèn Papa Diosmi sinani ami catamétin. ²⁰An —'ëx cana Nucèn Papa Diosmi sinani ami catamëti —quicé 'aishbi ami nishquin uni itsi nuibacëma 'aish ca a uni cëmëia. Usa 'ixun ca a isquinbi uni itsi nuibaquin sináncëma 'ixun a iscëma, Nucèn Papa Dios, aribi sinanima. ²¹Ëné bana ca Nucèn Papa Diosan nu 'ináncëxa: axa ami sináncé uni ax ca uni itsimiribi sinánti 'icén.

Ñu 'atima 'acëcama ënquin 'atëcëntima bana

5 ¹An —Jesús ax ca Cristo, axa utia judíos unicaman caían, Nucèn Papa Diosan Bëchicé, a 'icé —quixun sináncé unicamax ca Nucèn Papa Diosan bëchicëribi 'icén. Uicamax cara Nucèn Papa Diosmi sinania ax ca aín bëchicé camamiribi sinania. ²Usa 'ain cananuna 'unanin, nux ami sinánquin Nucèn Papa Dios quicësabi oquin 'acé 'aish cananuna aín bëchicëcamamiribi sinani quixun. ³Axa Nucèn Papa Diosmi

asérabi sináncë uni, an ca aín bana quicësabi oquin 'aia. Ax quicësabi oquin 'aia ca a bana 'icën. ⁴—Ax quicësabi oquin 'anun ca Nucën Papa Diosan 'ë 'aquinia —quixun 'unani ami catamëcë 'ixun ca aín bëhchicëcaman, an ënë menu 'icë ñuishi sináncë unicaman 'acësaribi oquin 'aquin ñu 'atima 'ati ashiquin ënia. ⁵Axa —Jesús ca asérabi Nucën Papa Diosan Bëhchicë 'icë —quixun 'unani ami catamëcë uni an cuni ca ënë menuxuan ñu 'atima 'acëcama ënquin 'atëcënima.

Jesús ax ca asérabi Nucën Papa Diosan Bëhchicë 'icë quixun 'unánti bana

⁶Jesucristo ax ca axa 'unpaxan nashimicë 'ianan aín imi 'apati bama a 'icën. 'Unpaxan nashimia ashima aín imi 'apati bamaribi ca ax 'icën. Nucën Papa Diosan Bëru Ñunshin Upitanribi ca —Jesús ax ca Cristo, asérabi Nucën Papa Diosan Bëhchicë, a 'icë —quixun nu 'unánmia. Nucën Papa Diosan Bëru Ñunshin Upí ax ca Nucën Papa Diosan sinánsaribi 'icën. ⁷Usa 'ain ca naínu 'icë Nucën Papa Dios 'imainun aín Bana, Jesucristo, 'imainun aín Bëru Ñunshin Upí, acama 'aish rabé 'imainun achúshi 'icën. Usa 'aishbi ca achúshishi 'icën. Anribi ca nu 'unánmia, Jesus, ax ca asérabi Cristo, Nucën Papa Diosan Bëhchicë, a 'icë quixun. ⁸Ënë menuxun Nucën Papa Diosan Bëru Ñunshin Upitan 'unánmicë 'ianan Jesucristo 'unpaxan nashimia sinánan axa aín imi 'apati bama, acama sinánquin cananuna 'unanin, Jesús ax ca asérabi Cristo, Nucën Papa Diosan Bëhchicë, a 'icë quixun. ⁹Unin bana cuananbi cananuna aín Bëhchicë Jesucristo ñuia, axira unin banabë sënénma 'aish Nucën Papa Dios quiá bana aira cuati 'ain. Ënëx ca aín Bëhchicë ñui Nucën Papa Dios quiá bana a 'icën. ¹⁰Axa aín Bëhchicëmi catamëcë

uni, an ca Nucën Papa Diosan 'unánmicëxun asérabi 'unania, Jesucristo ax ca asérabi aín Bëhchicë 'icë quixun. Usa 'aínbi ca an Nucën Papa Diosan bana ca asérabi 'icë quixun sináncëma uni, ax —Nucën Papa Dios ca cëmë 'icë —quicësa 'icën, an aín Bëhchicë ñui quicë bana ca aséribima 'icë quixun sináncë cupí. ¹¹Nucën Papa Dios ca quiacëxa, aín Bëhchicëmi catamëcë cupí cananuna an 'imicëx ainan 'aish xëñibua 'aínbi abë 'iti 'ai quiax. ¹²Uinu 'icë unix cara Nucën Papa Diosan Bëhchicënan 'icë, a unix ca usaribiti nëtétimoi Nucën Papa Diosbë 'ia. Usa 'aínbi ca uinu 'icë unix cara aín Bëhchicënanma 'icë, a unix xëñibua 'aínbi Nucën Papa Diosbë 'ima.

Bëruánx 'inun caquian ashiquin 'ësëa bana

¹³Aín Bëhchicëmi catamëcë 'aish camina ainan 'aish Nucën Papa Diosbë xëñibua 'aínbi 'iti 'ai quixunmi 'unánun cana ënë ñucama mitsu cuënëoxunin.

¹⁴Cananuna 'unanin, nun nu aséribi ax cuëncësabi oquin ñu ñucácëxun ca Nucën Papa Diosan nun bana cuatia quixun. ¹⁵Usaquin ñucáquin cananuna 'unanin, Nucën Papa Diosan ca nun ñucácëxun cuaquin, anu ñucácë ñu 'inánan nun ñucácësabi oquin nu 'aquinia quixun.

¹⁶Abëa Jesucristomi catamëcë uni itsían ñu 'atima 'aia 'unánquin ca unin —tëréntisama 'inun ca 'uchacëma 'icë —quixun sinánquin aín 'ucha tërénquin sinanaminun Nucën Papa Dios ñucáxunti 'icën. Ñucáxuncëxun ca Nucën Papa Diosan aín 'ucha tërénquin a uni upí 'itëcënnun 'imiti 'icën. Usa 'aínbi cana axa tëréntisama 'inun 'uchacë uni a Nucën Papa Dios ñucáxunun quixun mitsu caiman. ¹⁷Camabi ñu 'atima 'acë ax ca 'ucha 'icën. Bëtsi bëtsi

'ucha ca uisoxunbi tërëcaisama 'icën. Usa 'ainbi ca camabi 'uchax tërëcaisamama 'icën.

¹⁸Cananuna 'unanin, asérabi Nucën Papa Diosan bëchicë 'aish ca uni amiribi amiribi 'uchaima. Usa 'icëa Nucën Papa Diosan Bëchicë Jesucristonën bërúanquin 'aquinia ca ñunshin 'atimanën uisabi oima.

¹⁹Cananuna 'unanin, nuxnu Nucën Papa Diosnan 'ainbi ca camabi menu 'icë unicamax ainanma 'aish ñunshin 'atimanën 'apunan 'icë quixun.

²⁰'Unánan cananuna ësaquinribi 'unanin, ain Bëchicënën ca ënë menu ax uá 'áinu ami catamëtia uisa cara Nucën Papa Dios, axëshia asérabi Dios, ax 'icë quixun nu 'unánmia. Ain Bëchicë, Jesucristo, ax nubë 'ain cananuna an 'aquincëx ax cuëncësabi oi tsotin. Ax ca axëshia asérabi Dios 'áinu nux ainan 'aish abë xënbua 'ainbi 'iti a 'icën. ²¹'Ën bëchicësa 'icë cana mitsu cain, anbi sinánxuan dios isa quixun a rabinuxun unínbi 'acë ñucama camina rabbitima 'ain. Ashi, Juan.